

## Saksprotokoll i fylkestinget - 17.12.2019

Innkallinga vart godkjent utan merknader.

**Sigbjørn Framnes (FRP)** la fram søknad om midlertidig fritak for representanten Terje Søviknes på dag 2 av tingsete og ba om at denne vert behandla i fylkestinget. Fylkestinget vedtok samråystes å sette sak om fritak for Terje Søviknes på sakskartet utan saksførelegg.

Saklista vart godkjent med merknaden over.

### OPNING AV FYLKESTINGET

Fylkesordføraren heldt opningstalen sin til fylkestinget.

Fylkesrådmannen heldt sin tale.

### ORDSKIFTET ETTER TALANE

Etter talane var det ordskifte. 19 representantar hadde ordet.

**Jeanette Syversen (R)** sette fram forslag om fråsegn om «Ja til mangfold – Nei til skular som diskriminerar!».

«Ja til mangfold – Nei til skular som diskriminerar!

I Bergensavisen, kan ein 13.12.19 lese følgjande:

**«Over 2000 elever i Hordaland går på skoler som ikke ansetter lærere som lever i et homofilt samliv.** Det viser BAAs gjennomgang av verdigrunnlaget til 15 kristne private grunn- og videregående skoler i fylket. Ti skoler sier nei, tre sier ja, mens de to resterende gir uklare svar. De ti nei-skolene har til sammen 2234 elever, og får i 2019 rundt 240 millioner kroner i statsstøtte.»

Vidare står det i artikkelen: «Seks av skolene er drevet av Egill Danielsen stiftelse. I deres felles verdidokument, som nyansatte må skrive under på ved tiltredelse, står det blant annet:

«Det livslange, monogame ekteskap mellom mann og kvinne er rammen for det seksuelle samliv. Det forventes at alle lever i samsvar med dette.» Dokumentet inneholder også punkter som gjør det klart at abort er uønsket, og at Guds ord står over norsk lov.»

Dette meinar vi kan vere eit brot på intensjonen i likestillings- og diskrimineringslova. Private skular er arbeidsgjevarar og målberande institusjonar på lik linje med offentlege skular og er difor forplikta til aktivt vere med på kjempe imot diskriminering på bakgrunn av legning, kjønn, religion og etnisitet.

Det følgjer av arbeidsmiljølova at direkte og indirekte diskriminering på grunn av seksuell orientering er forbode. Fylkeskommunen set krav til alle skular om at dei skal halde seg innanfor lova.

I Hordaland fylkeskommune sin Handlingsplan mot diskriminering av lesbiske, homofile, bifile og transpersonar heiter det blant anna at «Alle nivå i skulesektoren i Hordaland fylkeskommune skal arbeide for å utvikle eit læringsmiljø som fremjar god helse og læring for lhbt-befolkninga», og dette må sjølv sagt også gjelde for dei private vidaregåande skulane under nye Vestland fylkeskommune. Uavhengig av om skulane er private eller offentlege, vil Vestland fylkesting seie ja til mangfold og nei til diskriminering.

Vestland fylkesting forsvarar retten til fritt å velje kven ein vil elske og leve saman med, uavhengig av kjønn, legning, etnisitet og religiøs overtyding. Vestland fylkesting vil sende ein klar og tydeleg beskjed, til kunnskapsdepartementet, regjering og storting, om at systematisk diskriminering av LHBTIQ-personar i regi av skulen, er ikke akseptabelt og bør opphøyre.»

Fylkestinget slutta seg til å sette fråsegna på sakskartet. Saka vert satt på sakskartet som PS 46/19 Fråsegn om «Ja til mangfold – Nei til skular som diskriminerar!».

**Anne Gine Hestetun (A)** sette på vegner av A, H, Sp, MDG, KrF, SV, V, Frp, Pp, R fram forslag om fråsegn om «Styrk medisinutdanninga på Vestlandet – behald utdanninga ved Universitet i Bergen» til departement, statsråd og Hordlandsbenken og Sogn Fjordane-benken.

#### «Styrk medisinutdanninga på Vestlandet – behald utdanninga ved Universitet i Bergen

Grimstadutvalget leverte i september 2019 sin innstilling «Studieplasser i medisin i Norge - Behov, modeller og muligheter» til Kunnskapsdepartementet.

For å kunne dekke landet sitt legebehov er det trøng for 440 nye studieplassar på medisin i Norge. Vestland fylkesting meiner det er avgjerande at fordelinga av desse nye studieplassane sikrar ei robust og slagkraftig medisinutdanning, og at vi samstundes sikrar at vi har nok legar i vårt geografiske område. Universitetet i Bergen har utvikla ein visjon om å utdanne «Vestlandslegen»; legar på Vestlandet, for Vestlandet, som eit pedagogisk kompetanseløft i heile landsdelen. Planen skal ikkje berre tene studentane, men også tilføre heletenestene i Helse Vest akademisk kompetanse, styrke kvaliteten og konkurransekrafta i forskingsmiljøa, betre samarbeidet mellom helseføretaka og betre rekrutteringa i regionen. For å nå desse måla meiner Vestland fylkesting at det ikkje bør startes eit eige medisinsk fakultet i Stavanger, men heller bygga oppunder det tilbodet som allereie er utvikla ved Universitet i Bergen.

Vestland fylkesting støtter således opp om utvalgets medlemmer Grimstad, Hunskår og Straume som anbefaler «at det i den foreslalte opptrappingen av studieplasser ikke gis gradsrettigheter for profesjonsstudiet i medisin til flere universiteter enn dagens fire.»

Ei oppdeling av medisinutdanninga på Vestlandet vil få mange ueheldige konsekvensar. Det vil både vere svært kostnadskrevjande, det gjer dårleg utnytting av eksisterande fagleg og administrativ infrastruktur og det vil føre til mindre konkurransekraft om norske og internasjonale forskningsmidlar. Ein fordel med ei samla utdanning er at utdanningsinstitusjonen kan sjå heile landsdelen under ett, og sikra at heile Vestlandet vert tatt i bruk når studentane skal ut i praksis, slik UIB allereie gjer ved sjukehusa i Bergen, Førde, Haugesund og Stavanger. Dette gjev rekruttering av legar på heile Vestlandet.»

Fylkestinget sluttet seg til å sette fråsegna på sakskartet. Saka vert satt på sakskartet som PS 47/19 «Styrk medisinutdanninga på Vestlandet – behald utdanninga ved Universitet i Bergen».